

23

" SU VANAGRORIOSU "

Po si prettendi sempiri dd'obbidid
S'idea ca su presumi pagu còstada
E cantu prus presumid prusu ammòstada
A tottucantus su chi non possidid.

Murrungiosu

A S'ANI

De su casiddu tantu premurosa
Ti biu in di de basca e de friscura
A su mengianu bessendu festosa
A sig sag a s'immensa campura.

E candu primavera vigorosa
Bonid, e i sa terra de bellura
Amantad cun virtudi generosa,
Tui de tantis froris sa dulciura

Nd'arregollis e terras carriada
Aund'est sa tua cara compagnia,
Aintra 'e su casiddu affattigada,
Traballendu cun vera simmetria.

E cant'arti e sistemas de sa vida
Insegnas a s'intèra umanidadi !
Obbediri a un'unica guida...,
Fraternu asori cun utilidadi.

Previdensia, costensia e gelosia
Ndi tenis, cantu bona e virtuosa
Sesi, e de chin'had tanti tinoria
'E su traballu sempir'odiosa

Ti mostras e circhendu 'e ddu distrid
Ddi donas sa tremenda lesioni ...
Passiensia; ca sola non ses tui
Traballendu po biri su mandròni !

(Murrungiosu)

A SU PIPPIU POBURU

Si profumu non mandad su barzolu
Aundi ti riposas pagu o meda,
E su coscinu duru che sa preda
Portas, e tutt'accòncius su lenzòlu,

Bregungia no ndi tengas, mancu dolu.
E si non bistis cun punnus de soda,
Penza, ch'in s'urna contraris, sa scheda
Non dd'èttad sa fortuna a tui solu.

Sa sorti dda bis sempiri girendu,
Non usad in su mundu a si firmari:
A nisciònus de nosu iss'est circhendu.

Si bramas cun amori 'e t'abbrazzài,
Bivi sempir'onestu e virtuosu:
Ch'est sa ricchessa chi non fàllid mai.

Marrungiosu